

SCIOH

## Arjënt per l Gherdëina tla seria A y B

Cun doi segondi plazamënc tla seria A y seria B y n setim tla seria C grupa est ie per la trëi scuadras dl Club Scioh Gherdëina n sada passada finà l 55ejim Campiunat provinziel a scuadras



FM Stefan Moroder a m.c. contra FM Francesco Seresin (ex Gherdëina y sën dl Arci Bulsan).

Niccolò Casadio se à davanià cun permò dejeset ani l titul de maester FIDE pra l turnoi nternaziunel al Lago d'Iseo y ie l cuinto dla Lia Scioh Gherdëina a se davaniè chësc titul renumà. L Gherdëina 1 à cun 16 ponc de squadra sun 18 y 41,5 ponc ndividuei sun 54 puscibli dessegur fat un de si miëur campiu-nac dla storia, mé che un di doi pères tl scumenciamënt dla sajón ie stac de massa per se plazé dan l Neva Tudëscia. La squadra che à venciù y che fova metuda adum da feter mé jugadëures dl Veneto à fat de ndut 17 ponc.

La terza forza dl campiu-nat ie chëst ann stat l «Joseph-Richterclub» de Bulsan cun 12 ponc. Chësta tlassifica ie unida a s'l dé do l nono di de campiu-nat ai 9 de merz, canche l Gherdëina à batù l ASD Arci Scacchi Bulsan 3,5 a 2,5. Bën ot ponc su nuef à ntan l ann fat Thomas Moroder y Christian Grossi. Ruben Bernardi à contribuì cun set ponc y Rainer Demetz cun 6,5. Lorenzo Casadio à fat 2,5 ponc sun trëi y si mut Niccolò, diventà da permò FM, 4,5 sun set. La miëura performance dla squadra, cun 2274, à arjont Stephan Moroder sun la prima mëisa cun bën 5 ponc.

Drët tan bën à fat chëst ann l Gherdëina 2 tla seria B, ne perdan deguna partida, ruvan segundo cun 15 ponc sun 18, do l Maran y dan l Taufers, se assegaran nscila la rejon do 29 ani de jì inò su tla serie A tl campiu-nat che vën. L'ultima partida cun l ASD Arci Bulsan 3 ie unida valiveda ora cun n 2,5 a 2,5.

Per l Gherdëina 2 à chëst ann jugà diesc jugadëures y la miëura performances à da mustré su Lorenzo Casadio cun 1807, Alam Syed M. cun 1788 y Matteo Scola cun 1725 y 5,5 ponc sun ot. L capitán dl Gherdëina 2, Matthias Kasslatter, à contribuì cun cin' ponc sun nuef.

Per stlù ju mo la prestazion positiva dl Gherdëina 3 tla seria C est: la squadra scialdi jëuna ie ruveda setima cun sies ponc y mpenian tla nuef partides de ndut undesc jugadëures. La miëura prestazion à fat Kimo Prinnoth cun trëi ponc sn cinch, Josef Demetz cun 2,5 sun trëi y Bean Demetz cun doi sun cater.

Cun n terzo di cumëmbri de età sot ai 25 ani ie l dauni dla lia dessegur segurà.

Per l Club Scioh Gherdëina, Ruben Bernardi

SNOWBOARD

## La sajón staurdinera fina via cun l arjënt

La Copa dl Mond de slalom paralel 2023/24 ie ruveda ala fin. Daniele Bagozza de Urtijèi à arjont l segundo plazamënt de categoria. N dumënia passada à mo pudù festejé l or tl team event cun Lucia Dalmasso. La paroles dl atlet

— Vã inant dala prima plata

La sajón staurdinera dl atlet se à depënt de arjënt, n resultat che desmostra l bon lëur fat y dà gran mutivazion per l dauni.

La paroles dl atlet: «L ie bën da bestia sciot per la copa, ma l corean Lee ne fossa mpo nia stat da bater n chël di. Nce sce esse fat na bona garejeda y esse arjont l terzo plazamënt, essi mpo perdù la copa. Mi gran problem ie stat che é fat la prima garejeda de cualificazion contra n atlet svizer che se à fat bëndebò ert te chësta sajón. Me sentive bëndebò plu asvelt ntan che furnove ju, ma pona é udù che fove n secunt y mez dovia. Danz che chël ne recuperien nia plu te na garejeda tan plana. Mueia, mueia. Pona tla segunda garejeda de cualificazion é resià mpue, é tëtut na brëia che ne n'ove mei tëtut chëst ann te na garejeda. É bën fat l miëur tëm, ma chël ne me à nia bastà per ruvé tla fineles, ala fin é fat l 19ejim post. Bën sciot, ne é fat degun fal a furné ju ma fove mefun massa cunservatif, y propi canche n ie te de tel situazions, suzed chësta roba, chël fova belau mpue da se aspité. Dala garejeda tla Polonia incà éi durmi scialdi stlet dan la garejedes, ma propi scialdi stlet. Iló muessi cialé co fé l ann che vën, per pudéi durmi... scenó iel danz n problem».

N con' dl resultat finel nes àl dit: «Ala fin dla finedes ie l segundo post generel stat na fertuna dla desfertuna, ajache l fossa mpo stat n valguni che essa pudù me pië. Perchël sons bën mpo cuntënt. Cie che me tole



Daniele Bagozza y Lucia Dalmasso à venciù l or tl team event mundiel a Winterberg.

Foto: Miha Matavz

pea ie l'esperienza dla prescion, l prim iede cun na tel prescion. N pudëssa miné che te ses pu mpo co te astilé, ma l ie mpo zeche de nuef per la persona, per l cè y per l corp».

L or tl team event cun Dalmasso

N dumënia passada iel mo stat l'ultima garejeda de Copa dl Mond, ma tl team event, for a Winterberg ti Paejes Tudësc. Bagozza à inò garejà cun Lucia Dalmasso, cun chëla che l ova bele venciù l arjënt a Bad Gastein ai 17 de jené.

«Tl team event ne n'ovi nia plu chëla gran prescion. Iló ovi plutosc na stleta sensazion, ti otafs y ti cherc, ma é abù la gran fertuna che Lucia (Dalmasso, ndr.) à fat na garejeda

super y à recuperà. Pona ons tëtut la dezijion de mudé trassa, de jì sun la cuecena, ulache la ie jita bëndebò miéc per mé. Tla finela éi pona venciù per doi centejims y Lucia ie stata bona de mëter leprò mo cater centejims. Na garejeda finela da bestia spettaculera y emuziunenta, son da stramp cuntënt per nëus doi, plu che auter a ti cialé ai Mundiei dl ann che vën, ulache l sarà per l prim iede nce l team event. Esse gën sce l restëssa chësc bel team, pona sei che pudësan arjonjer zeche de bel», nscila Daniele Bagozza a La Usc, do na sajón mundiela de marueia, cun na udleda bele ala proscima.

Bruno Maruca